

文徵明全集

文徵明詩卷一

長洲文徵明撰

□ 詩八十九首（附錄四首）

□ 秋夜

忽忽故園夢，悠悠上城一；一夜耳不息，水邊疎柳聲；開門月如晝，十里秋盈盈；中心亂無執，散上岡頭行；吳山望不際，眼角柔雲生；男兒志遺世，物故難爲情。

□ 故園

屋舍小山村，終然思故園；雨晴秋倚閣，月出夜開門；好景亦時改，遠人空自存；梅花未消息，行矣晚何言？

□ 有懷劉協中

東風度幽館，羣鳥相和鳴；念子會無期，茫然過清明；春江芳草遠，懷懷心目驚；如何多朋友？我獨傍山城；豈無樽酒歡，亦有花木榮；所憐異鄉物，徒念心怔營；白雲度水去，日暮山縱橫；倚闌詠修竹，千

里何當并。

□ 荅唐子畏夢余見寄之作

故人別後千回夢，想見詩中語笑譁。自是多情能記憶，春來何止到君家。

□ 行色

秋山馬前空復橫，馬蹄不作看山行。悠然回首何處所？先心已到他州城。火燈匆匆鷄一聲，貴賤富貧俱有程。相看一語出不得，細雨欲落空江明。

□ 東葛城夜發

蕭蕭東葛路，馬上聽嚴更。月出高山黑，天空遠水明。年光秋漸索，客子夜猶行。村落知何處？時聞犬吠聲。

□ 至定山辱莊先生贈詩次韻奉荅

穉齒窮身豈有知，偶陪高論得移時。感公不以愚頑棄，願我何堪遠大期。草閣便須終歲住，僕人休訝出山遲。歸來乞得堯夫句，暮雨秋燈不斷思。

附定山莊先生贈詩

一燈何處寫相知，對坐寒窗暮雨時。詩本平生非杜甫，琴才臨老遇鍾期。儘堪出手名家早，但覺忘年得友遲。儻許無言真妙意，欲將千載慰深思。

□ 不寐

孤坐忽不樂，桃燈當我前。素書橫几案，欲讀已茫然。當年念有負，誓志軼前賢。富貴亦何物，未老已自憐。嗟哉昔惡聞，零落今同焉。

□ 大雪不出偶成八韻自齋中所見外皆禁不犯

靜坐朝慵出，不知風雪臨。凝暉上窗紙，積冷到衣衿。小片投牆隙，餘威結研心。聆音琤可喜，想像浩難禁。童子傳來看，家人報說深。卷書空自照，杯酒不辭斟。意賞何煩對，傳聞不害吟。未應閉戶臥，不及放舟尋。

□ 簡子畏

落魄迂疎不事家，郎君性氣屬豪華。高樓大叫秋觴月，深幄微酣夜擁花。坐令端人疑阮籍，未宜文士目劉叉。只應郡郭聲名在，門外時停長者車。

□ 甲寅除夜雜書

千門萬戶易桃符，東舍西鄰送歷書；二十五年如水去，人生消得幾番除？
多事關心偶不眠，隨人也當守殘年；不須更說新春事，來歲今宵在目前。
人家除夕正忙時，我自挑燈揀舊詩；莫笑書生太迂闊，一年功課是文詞。
小童篝火潔門閭，爲說新年忌掃除；却有窮愁與多病，無因歲晚一般驅。
迢夜遲遲燭有花，家人懽笑說年華；人生勿苦求身外，常得團圓有幾家？

崇義院雜題

小院風清橘吐花，牆陰微轉日斜斜；午眠新覺書無味，閒倚闌干嗽苦茶。
縹緲游絲墮不收，悠然庭砌綠陰稠；院涼僧少音聲絕，時聽敲門亦自幽。
六月門前暑似炊，殿堂深處未曾知；晚涼浴罷思歸去，更爲松風佇少時。
殿閣微涼吹葛衣，檻前梅子雨霏霏；清談時有閒僧對，手擘棊欄當塵揮。
白日悠悠抵歲遙，困來書卷暫相拋；馬蹄不到松陰下，手弄殘棋獨自敲。
茗碗爐薰意有餘，日長人散閉精廬；悠然屋角涼風順，吹起新蟬亂讀書。
繞寺松杉近百栽，孤花明透綠叢開；晚涼却扇池邊立，嬾嫋餘芬度水來。
聚几新楷滑欲流，時時弄筆小窗幽；自憐多好還成累，揮汗爲人寫扇頭。
修廊如洗斷塵囂，白粉牆圍碧瓦寮；擁鼻徐行成獨詠，晚風吹亂石芭蕉。

飲子畏小樓

今日解馳驅，投閒傍高廬。君家在皋橋，誼園井市區。何以掩市聲，充樓古今書。左陳四五冊，右傾三兩壺。我飲良有限，伴子聊相娛。與子故深密，奔忙坐闕疎。旬月一會面，意勤情有餘。蒼烟薄城首，振袖復躊躇。

余畫金焦落照圖吳水部德徵先生寄詩二首題謝長句

憶昨浮船下楊子，平翻渺渺波千里。何來雙鳥挾飛樓，璀璨彤煌截濤起。夕峯倒墮滿江陰，霜樹高浮半空紫。舟人指點落日處，凌亂烟光射金綺。平生快覩無此奇，却恨歸帆北風駛。至今偉蹟在胸中，回首登臨心不已。偶然興落尺紙間，便欲平吞大江水。固知心手不相能，塗抹聊當臥游爾。晴窗舒卷日數回，不敢示人聊自喜。水部先生詩有名，忽寄瑤篇重稱美。漫云家法自湖州，自媿區區何足齒。由來題品係名聲，何況先生是詩史。君不見當年畫馬曹將軍，附名甫集猶不死。又不見閻公自謂起文儒，池上俄蒙畫師恥。人生固有幸不幸，拙劣何堪古人擬。江山千載等陳迹，一笑寧須論非是。

附水部二詩

戲拈秃筆寫金焦，萬重青天見玉標。未用按圖神已往，耳邊似接海門潮。閒寫金焦鎮海門，夕陽孤鷺淡江痕。一枝畫筆承傳久，須信先生老可孫。

乙卯除夕

糕果登盤酒薦椒，笑歌聊用永今宵；老親自喜還家健，幼女仍誇學語嬌；終歲悲歡言莫盡，一燈團聚福難消；桃符日歷年年好，不謂青春却暗凋。

春暮

高榆風定翠相圍，天氣悠揚思轉微；晝閒凝香新試扇，春肌生汗欲更衣；乍聞幽鳥渾無見，時墮游絲忽漫飛；惆悵東園尋曉夢，落花芳草已都非。

靈巖山絕頂望太湖

靈巖山正當胥口，落日西南望太湖；雙島如螺浮欲吐，片帆和鳥去俱無；閒論往事何能說，不見高人試一呼；慎勿近前波浪恐，大都奇經在模糊。

讀于肅愍旌功錄有感

南遷議起共倉皇，一疏支傾萬弩強；既以安危繫天下，曾無羽翼悟君王；莫嫌久假非真有，祇覺中興未耿光；淺薄晚生何敢異，百年公論自難忘。

老臣自處危疑地，天下遑遑尙握兵；千載計功真足掩，一時起事豈無名；（當時欲赦于王，或謂：

不殺二人，則今日之事爲無名。然則復辟之事，豈無名哉！未論時宰能生殺，須信天皇自聖明。地下有知應不恨，萬人爭看墓門旌。

因讀旌功錄有感徐武功事

固鎖高垣事可吁，更憑何罪易皇儲？諸公方有同謀懼，識者能無意外虞！機會如斯何可失，功名之際本難居。冤哉一掬江湖血，信史他年未必書。

冬夜讀書

故書不厭百回讀，病後惟應此味長。千古精神如對越，一燈風雨正相忘。卷中求道深知謬，意外圖名抑又荒。束髮心情誰會得，中宵撫几自茫茫。

寂夜一首效子建

中宵聞零雨，撫枕起躊躇。昏缸棲素壁，流焰照重幃。感此寂無語，戚然興我思。我思何鬱伊，欲舉夢如絲。少壯不待老，功名須及時。男兒不仗劍，亦須建雲旗。三十尙隨人，奚以操筆爲？文章可腴道，曾不療寒饑。仰屋愧浮塵，俯睇影依依。人生良有命，何獨令心悲。心悲髮爲白，失脚令身危。欲爲絕世行，道遠恐不支。世情忌檢飭，斂目俟其疲。誰能七尺身，受此千變機？役役亦徒爾，多憂得無癡。惟應慎厥躬，古人以爲期。

春閨

綠陰生寂晝遲遲，薄汗沾裳氣力微；起傍曲闌垂手立，清風細細落薔薇。

兒子睟日口占二絕句

堂前笑展晬盤時，漫說終身視一持；我已蹉陀無復望，試陳書卷卜吾兒。
吾家積德亦云稠，不易生兒到歲周；印綬干戈非敢冀，百年聊欲紹箕裘。

秋夜不寐有懷錢二孔周

客散西堂夜悄然，修筠涼吹供清眠；疎螢紈扇秋無賴，淺水紅渠月可憐；侍女銀杯搖雪乳，誰家玉笛唱嬋娟；意中憶得城東闕，孤鶴翩翩骨有仙。

前年

前年伴嫁南鄰妹，今歲仍陪北舍姨；老我無媒心獨苦，閉門好畫入時眉。

詠堯民案上盆蘭

崇蘭移自荆溪上，小盤春深目着花；賓客清閒塵土遠，曉窗親沃案頭茶。

渺渺微風約珮環，楚江清落研屏間。美人不見瑤琴歇，一卷離騷對揜關。

詠文信國事

地轉天旋事不同，老臣臨市自從容。誓將西嶺填東海，忍着南冠向北風。千里勤王空赴義，百年養士獨收功。人間別有成仁樂，未用區區悼此公。

倉卒勤王萬里身，風塵顛倒作纍臣。三綱已去嗟何補！一死臨期認自真。直以安危繫天下，未宜成敗論斯人。遺文尙可誅姦賊，何但悲辛泣鬼神！

國勢已離天命去，孤臣狼狽阻殘兵。分當如此餘非計，事訖無成死有名。平日公卿咸肉食，千年忠義屬書生。狂胡盜竊曾無幾，惜不令公見肅清。

南北間關百戰餘，此身宗社許馳驅。可憐功業惟詩在，自決存亡與國俱。夷狄至愚猶歎服，皇天無意竟何如。平生心事堪誰訴，漫托他年半紙書。

枕上聞雨有懷宜興杭道卿

時道卿客唐子畏西樓

三更風雨鬧虛簷，燈焰寥寥抱枕眠。應有旅遊人不寐，淒涼莫到小樓前！

厓山大忠祠

鼎湖龍遠野雲陰，慷慨中流誓國心。臣力不支香氣竭，忠魂有恨海波深。百年仁義空漸盡，此日

神州遂陸沉；峻節奇功磨不得；崖山突兀自千尋。

皇天不祐宰臣謀，萬里樓船一浪休；飄蕩已知吾事去，覆亡安用此身浮！祇令潮自如期至，終古江應不盡流；折戟併銷塵海換，行人猶自說綱州。

頻年航海欲何爲？天厭中原遂不支；滿地江湖無死所，際天風浪有平時；倉皇一念聊臣分，寂寞中流賴史知；回首又看強虜滅，寒潮自繞大忠祠。

千載英雄餘恨在，怒濤驚浪日椿撞；有天肯與元同戴，無面能看宋再降；烈士深悲甘蹈海，中原不復竟如江；君王莫罪風波惡，應是憐人解覆邦。

□ 追和倪元鎮先生江南春

象牀凝寒照藍筍，碧幌蘭溫瑤鴨靜；東風吹夢曉無蹤，起來自覓驚鴻影；彤籬霏霏宿餘冷，日出鶯花春萬井；莫怪啼痕棲素巾，明朝紅嫣壓作塵。□春日遲，春波急，曉紅啼春香霧濕；青華一失不再及，飛絲縈空眼花碧；樓前柳色迷城邑，柳外東風馬嘶立；水中荇帶牽柔萍，人生多情亦多營。

□ 雪後

寒日晶晶曉溜聲，中庭快雪一宵晴；牆西老樹太骨立，窗裏幽人殊眼明；想見漁蓑無限好，怪來詩思不勝清；江南殘臘相將盡，會看門前春水生。

□ 與邢麗文登葑門城樓

天風異制木蛇空，雉堞差差夕照中；百里山川形勝舊，萬家烟火歲年豐；迤南茂苑迷陳迹，直北荒原識故宮；會取千年興廢理，與君極目送飛鴻。

□ 夜坐聞雨有懷子畏次韻奉簡

皋橋南畔唐居士，一榻秋風擁病眠；用世已銷橫槩氣，謀身未辦買山錢；鏡中顧影鸞空舞，檻下長鳴驥自憐；正是憶君無奈冷，蕭然寒雨落窗前。

□ 歲暮齋居即事

簷樹扶疎帶亂鴉，蕭齋只似野人家；紙窗獵獵風生竹，上盎浮浮火宿茶；日色射雲時弄彩，雨絲吹雪不成花；庭中卉物凋零盡，獨有蒼松領歲華。

陋巷蕭條少過從，燕閒真味泊然空；荒鷄寂晝深庭院，寒雀西風小樹叢；撫事蹉跎歲云暮，懷人牢落雨其濛；鑪香欲歇茶杯覆，詠得梅花苦未工。

□ 過吉祥寺追和故友劉協中遺詩

殿堂深寂竹林閒，坐戀纓陰忘却還；水竹悠然有遐想，會心何必在空山？

塵蹤俗面強追開，慚愧空門數往還；不見故人空約在，黃梅雨暗郭西山。

附協中詩

城裏幽棲古寺閒，相依半日便思還；汗衣未了奔馳債，便是逢僧怕問山。

景德寺

古屋無人犬護籬，偶拋塵土得幽棲；不知何福能消受，滿地松陰一鳥啼。

次韻題子畏所畫黃茆小景

斜日翻波山倒浸，晚晴幻出西南勝；絕島雙螺樹色浮，遙天一線鷗飛剩；誰剪吳淞尺紙間，唐君胸有洞庭山；古藤危磴黃茆渚，細草荒宮消夏灣；我生無緣空夢墜，三十年來蟻旋磨；睡起窗前展畫看，恍然垂手磯頭坐；湖山宜雨亦宜晴，春色籠葱秋月明；知君作畫不是畫，八明詩境但無聲；古稱詩畫無彼此，以口傳心還應指；從君欲下一轉語，何人會汲江西水？

吳隱之畫像

貪廉自我非泉致，刺史詩篇萬古新；展卷蕭然袍笏在，世間多少負慚人？千年遺像識真難，重是高風不可刊；一樣廣州俱刺史，幾人傳入畫圖看？

□ 暮春齋居即事

經旬寡人事，蹤跡小窗前；暝色連殘雨，春寒宿野烟；茗杯眠起味，書卷靜中緣；零落梅花瘦，風吹更可憐！

閒庭青草積，春半思蒼茫；小雨作寒食，微風汎海棠；芳情經病減，白日廢書長；何物供欹枕？紫籬一炷香。

□ 畫鵲

日光浮喜動簷楹，鳥鵲於人亦有情；小雨初收風潑潑，亂飛叢竹送歡聲！

□ 畫鳥

城頭霜落月離離，而樹羣鳥欲定時；會有人占丈人屋，微風莫自裊空枝！

□ 與達甫燕坐小齋爲寫竹石

對坐焚香習燕清，好風如水汎簾旌；夕陽忽見疎疎影，落木空江生遠情。

□ 秋夜懷昌國

初秋雨時霽，夕景斂炎疴。踞屐遵廣除，矯首睇明河。白露浣衣帶，商飈振庭柯。縞月升雲闕，照我東牆阿。故人不得將，良夜空婆娑。非無一樽酒，顧影當奈何？陰虫抱莎啼，秋風在庭戶。微涼逗短葛，月出照團露。驚禽飛漠漠，顧見庭中樹。柔枝日以疎，安能共遲暮。人生豈獨堅，坐閱衡杓度。憂來騷短髮，衰薄已堪數。

□ 除夕

梅花欲動意婆娑，雪霰侵陵奈歲何？呵凍笑供春帖子，殘年清債已無多。辟瘟細細爇靈丹，坐倚寒檠向夜闌。臘意亦知人戀歲，爲當殘雪隔年看。

□ 題王侍御敬止所藏仲穆馬圖

犖犖才情與世疎，等閒零落傍江湖。不應泛駕絕難用，閒看王孫駿馬圖。

□ 游洞庭東山

太湖

沙渚依依雲不動，風煙漠漠鳥飛回。橫空暝色自天下，絕島秋聲繞樹來。今古奔騰疑地盡，東南偉麗翻波浪。眼中浩蕩扁舟在，欲喚鷗夷酌一杯。

百街嶺

遙街百磴轉嶸崎，落日扶輿下嶺遲；與樹蔽虧湖冉冉，因山高下屋疊疊；儉勤成俗從知富，靈秀鍾人信有奇；十載一行殊恨晚，分金不見橘黃時。

宿靜觀樓守谿先生作記

抱被何緣三宿戀？燒燈一笑兩人俱；秋山破夢風生樹，夜水明樓月在湖；盡占物華知地勝，時聞人語覺村孤；不煩詩句追清賞，太史楣間記是闌。

游能仁彌勒

鬱然臺殿鎖芙蓉，見客山僧自打鐘；小檻浮空秋水闊，虛庭隨影夕陽松；泗州名在池無塔，（寺有泗州池，能照僧伽塔，今廢）飯石師歸寺有峯；（飯石禪師嘗住此寺，有飯石峯）欲掃南牆留半榻，白雲回首媿塵蹤。

宿靈源寺

夜隨鐘梵入靈源，一笑虛堂解帶眠；旋接僧談多舊識，偶依禪榻豈前緣；離離松檜搖山月，兀兀樓臺宿暝煙；塵句何年傳到此？（壁間有余詩）篝燈試讀已茫然。

翠峯寺雪竇禪師道場中有降龍井悟道泉

空翠夾輿松十里，斷碑橫路寺千年。
遺蹤見說降龍井，裹茗來嘗悟道泉。
伏臘滿山收橘柚，蒲團倚戶泊雲烟。
書生分願無過此，悔不曾參雪竇禪。

游洞庭將歸再賦

城中遙指一螺蒼，到此依然自一鄉。
曉鼓隔溪漁作市，（魚舟至則鳴鼓聚人）
秋風吹枳橘連牆。
名山更倚湖增勝，清賞剛臨月有光。
正爾會心空又去，不如僧住竹間房。

再和昌國游洞庭西山

自胥口入太湖

兼葭繚繞帶胥塘，百里沿洄笠澤長。
新水浮天舟浩蕩，遠山沉日樹蒼涼。
風烟西去堪乘興，鷄犬中流別有鄉。
詠得鱸肥人膾玉，自敲漁榜答滄浪。

登縹緲峯

薤草遙遶鹿兔蹤，飛嵐拂袖映疎松。
平湖萬頃玻璃色，落日千尋縹緲峯。
烟樹吳都晴上掌，秋風